



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 6

France PM Attal mapa nungi anenba Tir Macron-i magizük

Mizoram CM-i Taiwan Universities den MoU nung sign sütep

VOL. XXI ISSUE NO. 267 (ADOK 267)

DIMAPUR SANGTENNÜ (TUESDAY)

CHITENI (JULY) 09, 2024

₹ 5.00

TR Zeliang-i NHIDCL ktdangsür den ajuruteb Paglapahar nung mapa inyaksü atema bypass ka nüngdaker

Dimapur, July 8, 2024 (TYO): Executive Director NHIDCL R.P. Singh-i Deputy Chief Minister T.R. Zeliang-i den par kidang ajuruteba senden ka menogo.

T.R. Zeliang ya Planning & Transformation & National Highway Minister in-charge lir.

Senden nung T.R. Zeliang-i R.P. Singh dang Dimapur-Kohima 4-Lane nung safety measures aser quality control maparen inyaksü ashi aser short term plan aser long term plan yanglutsü nenshita metetdaksü.

NH-29 nung Paglapahar lenmang nung lendongsüdong atalokba azüoktsü atema mapa inyaksü paisa ashi.

"Iba mapa nung ROW ulushitsü nüngdak adokra state sorkari ali atema yariteptsü. Paglapahar lenmang nung mapa tiptema inyaksü atema bypass ka alitsü nüngdaker. Sokhuvi-Mhainamtsi bypass ya lenmang temesü lir anungji NH-129A Peren-Dimapur ajanga senzüsüla" ta TR Zeliang-isa ashi.

Kilometre 4 Paglapahar lenmang nung mapa timtema

inyaksü atema lenmang ajunga shibangtsüla aser NH-129A ya bypass ka amshitsü atema NHIDCL-i iba lenmang nung Package-IV mapa tekaratiba nung inyaksü nüngdakerm, ta paisa ashi.

RP Singh-ia Deputy Chief Minister dang Short Term Maintenance Contractor dang safety measures tekaraba nung inyaksü ashitsü nangzük.

NH-29 4-Lane road nung tesem aika nung 2-Lane dang lir aser signaba shitak malioba ajanga driver temi lendong ajurur anungji signage enoktsüla ta TR Zeliang-i ashiba Executive Director-i inyaksü nangzükogo.

Pai Hombar nungi ang ED (P) RO (Kohima) mapa inyaksü tenzük anungji Nagaland nung mapatong balala indang osang metetpelaba sülen lemsateptsü ta RP Singh-isa TR Zeliang dang ashi.

Nagaland nung Highway mapatongtem tajungba inyaka aotsü atema NHIDCL aser State sorkar tsüngda amalitepa inyaksü mulungtepa senden tembang.

PM Narendra Modi-i anogo ananü atema Russia semdang



July 8, 2024 nü The Carlton Hotel, Moscow kima nung Russia nung aliba India nungeri Prime Minister Narendra Modi pelashia agizükba angur.

Moscow, July 8, 2024 (Agencies): Prime Minister Narendra Modi-i anogo ananü atema Russia semdang aser Hombarnü pa Moscow tongogo.

PM Modi-i Russia President Vladimir Putin den 22nd India-Russia Annual Summit alitsü.

PM Modi aser President Putin na Mongulbarnü ajuruteptsü aser iba ya tesüiba küm 10 tsüngda tena 17 ben ajurutebpa asütsü.

Tena tesüsabuba ajurutepbaji

2022 küm Uzbekistan nung Shanghai Cooperation Organization (SCO) Summit nung ajurutebpa liasü. 2019 küm PM Modi nem Russia nung state honour tematiba "Order of the Holy Apostle Andrew the First" agüja liasü.

India aser Russia tsüngda mapang talangka tesentaktep tajung nung dang arur. Küm 77 tashi diplomatic tesentaktep yua arur 2010 nung "Special and Privileged Strategic Partnership" jenjang nung ajungketa liasü.

PM Modi-i Russia semdangba sülen Austria-i aotsü. Küm 40 tsüngda India Prime Minister kati Austria semdangbaji Modi mezüng asütsü.

Tanü Russia nung First Deputy Prime Minister Denis Manturov-i tayimtsü anendak PM Modi pelaa agizük aser iba sülen hotel-i meina ao.

The Carlton Hotel kima nung India nungeri PM Modi agizüksü atema ataa liasü aser pai parnok den ajuruteba sensaksem.

KMC Chairman aser Dy. Chairman shimogo

Kohima, July 8, 2024 (TYO): Kohima Municipal Council (KMC) kübok ward 19 nungi Nationalist Democratic Progressive Party (NDPP)-i 13 nung takok angu aser tanü pamoki chairman inyaksü atema Neikhozo Soukhrie shimogo.

KMC nung Urban Local Bodies (ULB) tentettsü atema High Power Committee (HPC)-i KMC nung councilors den külem senden ka amendang iba telemtetba agia liasü. Iba senden nung NDPP councilors ajak aden.

HPC nung Women Resources Development & Horticulture Minister Salhoutuonuo Kruse, School Education & SCERT Advisor Dr. Kekhrielhoulie Yhome, NDPP CEB vice president Theyiekie Tachu aser

NDPP Kohima Region president Prasielie Pienyu nunger dena lir.

Senden nung Ward 18 (Paramedical) nungi Neikhozo Soukhrie chairman inyaksü shim. Ward 2 (Bayavü Hill) nungi Avilie Rio-i Neikhozo tenüng benok aser ibaji Ward 8 (New Market) nungi Thejavizo Philip Solo-i pusema nungit.

Maneni, Ward 8 (Daklane) nungi Kazheli Tungoe-i KMC deputy chairperson atema Khrievi Chusi tenüng benokba Ward 15 (AG Tsiepfütsiepfhe) nungi Ketousie Khamo-i pusema nungita liasü.

Tenaprongla teloki mulung shimtet ta osang angazük.

KMC kübok ward 19 nung NDPP-i menden 13 aser NPP o Independent candidate asemsemi takok ngua liasü.

Kohima nung prangbong aser injang ayokba tesem lapoktsü melar

Dimapur, Chiteni/July 08 (TYO): Election maparen tembanga Election Model Code of Conduct mamshitsüsa akumnung, Kohima district kübok air rifle ayokba dokan tem densema prangbong aser inyak ayokba tesemtem tanaben lapoka akhi ama inyaksangshitsü melar,

ta Deputy Commissioner & District Election Officer, Kohima, Kumar Ramnikant, IAS ajanga sangdong ka nung metetdaksü.

Election Model Code of Conduct benokba mechi Kohima district nung air rifle shops tem densema prangbong aser injang ayokba tesemtem shibanga liasü.

Ni nenok adianu ka ama semdang: Rahul Gandhi



July 8, 2024 nü Congress MP aser Lok Sabha Leader of Opposition Rahul Gandhi-i Manipur nung relief camp ka semdangdang agiba noksa angur.

Imphal, July 8, 2024 (Agencies): Lok Sabha Leader of Opposition aser Congress MP Rahul Gandhi-i July 8 nü Manipur semdangogo. Manipur nung kin o kin tsüngda mepetmesü adokba sülen Rahul-i tan agi tasembenbuba atema Manipur semdang.

Hombarnü Rahul-i relief camps ana semdangba sülen "Ni yangi nür adianu ka ama aru ta Manipur nung alirtem dang shinür. Manipur nung yimjung bener arutsü atema ni nenok den külemi inyaknür" ta ashi.

"Ni tan agi tasembenbuba Manipur-i arur saka tensa tajungba melenshiba kecha majiteter. Manipur nung kanga mejungi atalokogo. Ni tensa

tajungba angutsü teimla liasü saka kecha temelenshi kecha maliba anguba agi mepelar" ta Rahul-i ashi.

"Ni relief camps semdangogo aser idakji alirtem osang angaogo. Ni parnok ashiba angatsü aser parnok temulung uludaktsütsü atema aru. Opposition nung nübo ka ama aser sorkari mapa inyaksü atema rongshitsü atema ni aru. Tang Manipur nung yimjung nüngdaker" ta pai ashi.

"Manipur state ana küma lemdanga lir aser nisung ajak atema takoksa ulura" ta paisa shisem.

Tanü Imphal airport nung arua anenzükba sülen pai Jiribam aser Churachandpur district tem nung relief camps

semdanga liasü.

Rahul-isa Manipur Governor Anusuiya Uikey den ajuruteb. "Ni Governor den ajuruteba sensaksemogo. Congress-i akokba tashi yaritsü Governor dang shiogo" ta Rahul-isa ashi.

"Onoki Governor dang mepelaba olentem shiogo aser tensa memelenshiba lemsatepogo. Iba iba onük ya politicise mesünür" ta paisa ashi.

Rahul-i taonung Imphal nung anenzüksü aser Manipur lennirtem den senden balala amentsü.

Yaküm May ita Manipur nung kin o kin tsüngda mangatettep adoka rara tenzükba sülen Rahul-i tasemben aser taküm Lok Sabha elections mezüng atema Manipur semdang.

Manipur nung Lok Sabha constituency ana lir aser taküm election nung Congress-i menden anaprong nung takok angu.

Congress-i Manipur nungi Bharat Jodo Nyay Yatra tenzük aser idangji Manipur nung yimjung aser teputep bener arutsü nangzüka liasü.

Tanü Manipur nungi Lok Sabha MP ana-Angomcha Bimol Akoijam (Inner Manipur) aser Alfred Kanngam S Arthur (Outer Manipur (ST) na den AICC General Secretary KC Venugopal nungeri Rahul Gandhi meina senzüa liasü.

Wb.Imlikümzük Kichu-i tepela lemsatepba sentong aka



Alongmen Ward Mokokchung nungi Councillor shimtetsang Wb.Imlikümzük Kichu-i pa den yaritepertem den tenüngsang aser tepela lemsatepba sentong nung jembidang tangokba noksa. (Mokokchung, July 8, 2024).

Mokokchung, July/Chiteni 08(TYO): Mokokchung Municipal Council(MMC) kübok mezüngbuba ULB election agiba nung MMC Ward number-2 Alongmen Ward nungi Councillor shimtetsang Wb.Imlikümzük Kichu-i pa den yaritepertem dang tenüngsang agütsüba sentong ka tanü Alongmen Ward nung par kidang kaogo.

Ita ka tejaklen Nagaland nung ULB election agitsü sangdonger kelen Wb.Imlikümzük Kichu-i pa Alongmen Ward nübur tenzüksü asoshi ULB election nung noktaksü telemtetba agir

kelen election maparen balala inyaka aru aser tatem tashi shirnokisa nübu, rongsen, shisatsü, sarasadem aser pei tashi akokba agi yaritepogo parnok ajak dang tepelaba metetdakja ashi.

Wb.Imlikümzük Kichu-isa 25 Mongoya AC aser NDPP Mokokchung Region-i pa dak temelung lemteta ULB election nung tokteptsü asoshi NDPP ticket agutsüba den külemi ano maparen ajak nung nungita yariba asoshi tepelaba metetdaksü.

Alongmen Ward tenzüksü asoshi mangdang ka yur temelungtetba tulu nung election

nung noktakogo, Tsüngrem teyari tulu den Alongmen nüburi temelung lemteta shimtet nung küm 5 inyakyonga aodang pa kija tangatetba aser tebilemba nung masü saka Alongmen yimsüsür aser nübur den tongtepratepa asüngdangyatepa shisa lemsateperang inyakyonga aotsü, anungji ajaki atsüayong mesüi ajak Alongmen Ward ajungkettsü asoshi Mokokchung yanglutsü asoshi nungita yaridaksünerta Imlikümzük-isa adenshia aliba Alongmen sangertem ayongzüka ashi.

Sentong nung Tsüngrem lenisüba jazüka MTBA Deacon Puna ajanga sarasademertenzükba den 25 Mongoya AC,NDPP Mokokchung Region,NDPP Alongmen Unit, NDPP Women Organisation Alongmen Unit, NDPP Youth Organisation Alongmen Unit, Kúpza Senso Telongjem Mokokchung aser Alongmen Ward Yimden nungi tenüngsang aser tayongzüka o jembiba den Tzüwamaong ajanga sentong nung shilem agir aser tadener ajak dang tepela o lemsatep aser Kr.Merenjungla ketdangsüba nung iba sentong agia tatem nung telok ajaki sarasadema iba sentong tembang.

Longrangty Longchar-i züluba "The Whirlwind" Kaket sayaogo



Longrangty Longchar-i züluba "The Whirlwind" kaket tanu Mokokchung Town Lanur Telongjem Kilem nung Wb.Imnaonen Pongen-I meraketa keta sayatsür kelen telok külemi tangokba noksa angur.

Mokokchung, July/Chiteni 08(TYO): Naga nung nungtoko kaketa zülur Longrangty Longchar-i züluba "The Whirlwind" Kaketa tanu Mokokchung Town Lanur Telongjem(MTLT) Kilem nung MTLT Tir Wb.Imnaonen Pongen-i meraketa keta sayatsüogo.

Nungtoko kaketa zülur aser külem medemsor Longrangty Longchar-i purapiteta aser talila shisatetba kaketa nübur tzüratema zünga tajangzük agitetsüsa züluba kaketa sayatsü maongka ngutetba asoshi kanga dang nüma tanga bilemer ta MTLT Tir Wb.Imnaonen Pongen-i ashi.

Longrangty Longchar-i

züluba adokba kaketem züngdanga aruba nung metongjemtetba shisatsü jenti nguteta kanga dang temoatsü nguogo, ano tang züluba kaketa The Whirlwind ajanga tazüngertem aika temoatsü angutsü aser talisa lanu asenotemi iba kaketa zünger kelen parnokia kaketa züluba mapa nung jangratsü teilmla lirta MTLT Tir Wb.Imnaonen Pongen-isa lemsatep.

Kaketa zülur Longrangty Longchar-i mapang tatsüka agia jembidang iba kaketa züluba mapang nung teyariteper ajak dang tepelaba lemsatep,kaketa Publisher tenüng nung Heritage Publishing House Dimapur

nung Dr.Asangla Tzüdir ajanga züluba tepela aser tenüngsang o sentong ketdangsür ajanga zünga lemsatep aser sentong nung Tsüngrem lenisüba jazüka aser kaketa meshitet sarasadem Children School Mokokchung Headmistress Wt.Toshimenla Walling ajanga agi aser Peoples College Mokokchung nung Asst. Prof. Kr. Molungnenla Pongen ketdangsüba nung iba sentong agi aser sentong MTLT lenirtem aser pur medemsor aika adenshia iba sentong kanga dang meraketa keta agia liasü.

Iba kaketa ya senpak 400 agi taginertemi "Greeting Craft" dokan MTBA Basement, Mokokchung nungi angutsü.

Pungro SDPDB senden nung sub-division terenlok atema jembidi

Dimapur, Chiteni/July 08 (TYO): Ita shia amenba Pungro Sub-Divisional Planning & Development Board (SDPDB) senden July 6, 2024 nü Cultural Hall, Pungro, Kiphire nung mena liasü.

Iba senden nung züngsemtemi Pungro Town nung aliba branch post office ya full-fledged post office upgrade asütsü jembidia liasü.

Parnoki Public Health Engineering Department (PHED) aser Power Department ketdangsütsü atema nübu tali nungdakba indang jembidi aser Power Department nung SDO aser JE indang government quarters yanglutsü temelaba agütsü.

Ali kumdanga aser shidak amshitsü, tajungtiba nung nübur tenzüksü aser service tajungba agütsütsü mechi board züngsemtemi Pungro nung department ajanga indang office alitsüsa Mini Secretariat ka yanglutsü atema jembidia liasü.

Pungro sub-division nungya Indo-Myanmar arütsü kilometre 34 densema geographical aser

demographic tsütsü kanga tongtipang alinungji Pungro nung SDPO office ka amenoktsü iba senden nung lemtet.

Ibai talisa temesepba chiyongtsü shibelenba, nok-nü shibelenba densema mapa tamajung inyakba nungi azioktsü nükjidong nung iba office ya amenoktsü lemteta liasü.

Senden nungsa sub-division nung two-lane project alignment aser ketdangsürtem posting indang jembidia liasü.

Iba senden nung Advisor, Fire & Emergency Services, Home Guards &

Civil Defence, Relief & Rehabilitation aser Chairman, SDPDB Pungro, S. Kiusumew

Yimchunger; Deputy Commissioner Kiphire, Temsuwati Longkumer aser Superintendent of

Police Kiphire, Chinese Chakhesang nung dena liasü.

Senden ya Additional Deputy Commissioner & Vice Chairman, SDPDB Pungro, Vekusheyi Rhakho lenisüba kübok agia liasü.

MLA Kevipodi Sophie-i Kigwema nung alinen alua aliba tesem sendang

Dimapur, Chiteni/July 08 (TYO): MLA, Kevipodi Sophie-i Kohima district kübok Kigwema Village nung alinen alua aliba July 8, 2024 nü sendanga liasü.

Pa meina SDO (C) Jakhama, Nockpai Konyak; EE PWD, Er. Wapanginba M. Jamir aser Kigwema Village Council Chairman, Balie Kire nungertem oa liasü.

MLA Sophie-i ketdangsürtem dang iba alinen ajanga teraksa agüja aliba asadangtsü aser tekeratiba nungi temaba ketdangsür dangi abentsü totuyuba agüja liasü.

Tzünglu tanen makai aruba ajanga alinen ya anogo ishika jakdang alua ki kar raksatsü aser Kigwema aser Mima Village tsüngta lenmang anebanga liasü.

Zunheboto nung ali tuluka anenzüka ao



Tzünglu kanga sashia aruba ajanga Alahuto colony, Zunheboto nung ki o jen raksar aliba noksa nung angur.

Dimapur, Chiteni/July 08 (TYO): Tzünglu kanga sashia aser tanen makai aruba ajanga Zunheboto jila kübok Alahuto colony nung ali tuluka anenzüka ao.

Iba colony nungi Zunheboto Town Council nung tang züngsem tasem shima alisang Vikheshe Aye-i ashiba agi, District Administration aser NSDMA Zunheboto nungi ketdangsürtem arua tensa asadanga lendong nungi jembia alitsü atema temeket nung alirtem ainshitsü ajungshia liasü.

Iba alinen agi kongshia alir kibong 13 nem District

Administration ajanga emergency relief fund agütsüogo, kong nisung takum kumzüktsü mechi ki asem raksatsüsa akum, ta Deputy Commissioner, Zunheboto, Rahul Bhanudas Mali, IAS ajanga metetdaksü.

Ali anenzüka aoba ya asadanga alinen tuluka alutsü amai ajitetet, koba nüburtem asoshi tebilemetsü tulu alitsü, ta pai ashi.

Iba ali anenzüka aoba nung ki o jen, electricity aser telephone poles/lines tem raksaba osang osanga lir.

SC nung NTA-i NEET-UG question paper leak asüba nangzükogo



July 08, 2024 nü New Delhi nung Supreme Court kima kaketshirtemi NEET tatidang tanaben agishitsü takhangba agüja longkak aitdang tangokba noksa nung angur. NEET UG 2024 exams nung ochimashi aliba ken o Supreme Court-i angadang tenzükogo.

New Delhi, July 08 (Agencies): Hombarnü Supreme Court nung NEET UG 2024 exams nung ochimashi aliba ken o angadamba mapang nung National Testing Agency (NTA)-i question paper leak asüba nangzükogo, ajisüaka tesem kar nung dang atalok, ta metetdaksü.

NTA-i, "Item ajak ya level tera nung dang atalok. CBI-iba bushisüngdangdar," ta ashi.

Supreme Court-i, "Iba examination akhümket samar süra, aibelener candidate temji asenoki mejangjara exam tanaben agishitsü atema tuyutsü," ta metetdaksü.

Hombarnü Supreme Court-i NEET-UG 2024 medical

entrance exam mangatettep ken o dak sendakba nung temepishiba ken 30 angadang tenzükogo. Item temepishiba ken otem rongnung June 5 nü agiba exam nung ochimashi aser tim mesüi inyakba mapatem liasü ta tai tongloktsüba ken otem densema lir.

Chief Justice DY Chandrachud leniba nung Justices- JB Pardiwala aser Manoj Misra nungeri akümba bench-isa Gujarat nung NEET-UG nung takok angur candidate 50 dak temai benokba temepishiba ken o-aka angadanddar. Item candidate temi Centre aser National Testing Agency (NTA) nem exam cancel mesüdaksütsü akhanger.

Osang angazükba agi, central sorkar aser NTA napronglai affidavit balala ajanga Supreme Court dang exam cancel asüba sülen tatidang tanaben agishitsü memelungba metetdaksüogo.

Chief Justice of India-i NTA dang question paper leak asüba mapang, paper ji koma leak süa koma prokshi aser paper leak asüba den exam agiba mapang na tsüngda mapang kobika liasü; item osang ajakji metetdakang, ta tuyuogo.

Supreme Court-isa CBI danga question paper leak asüba FIRs nung ajemdaker bushisüngdangba report ji Bodhbar tashi nung metetdakang, ta tuyuogo.

SC-i maneni item ken o ya Brihostibarnü angadangsü.

July 27 nü Niti Aayog Governing Council senden amentsü

New Delhi, Chiteni/July 08 (Agencies): July 27, 2024 nü Ato kilonser Narendra Modi leniba nung Niti Aayog 9buba governing council senden amentsü, aser iba senden nungji India ya terenlok linük ka kumdaksütsü nükjidong nung 'Vikshit Bharat@2047' document renemtsü atema o lemteptsü, ta ketdang kati metetdaksü.

Niti Aayog indang tongti tentet Governing Council nung züngsemtemji state ajak nungi chief minister tem, Union

Territories ajak nungi Lieutenant Governors aser Union Minister tem aika densema lir. Niti Aayog nung mendenbubaji Ato kilonser Modi lir.

"Council senden jakdang Union finance minister Nirmala Sitharaman-i Viksit Bharat mangdang tongmelang agi metetdaksütsü aser July 23 nü Budget indang action plan metetdaksütsü," ta Hombarnü sorkar ketdangser kati metetdaksü.

2047 küm tashi nungbo India

ya dollar sen trillion 30 rongsenkettsüng aliba terenlok linük ka kumdaksütsü atema vision document renemer.

2047 küm ya India nunger nüchiso anguba sülen küm 100 ajungba küm asütsü.

Viksit Bharat @2047 atema sector 10 tsütsü mangdang renemtsü asoshi 2023 küm Niti Aayog nem mapa nunglokja liasü. Iba vision document nung rongsenketzung tsütsü terenlok, loktiliba tsütsü terenlok aser junga yimsüsübaren densema lenla aika densema lir.



July 08, 2024 nü New Delhi nung Ato kilonser, Narendra Modi tayimtsü nungi Moscow-i apusotsü lia tangokba noksa nung angur.

EduVersity PLUS
CSE PREPARATION 2.0

BIGGEST NPSC DISCOUNT

OF THE SEASON

8 MONTHS
~~55,000/-~~ **Rs. 28,000/-**

Offer valid from 1st - 15th of July

Enroll now
+91 7005114715

NAGALAND BEST FACULTY PANEL

Sir Ruvisse Krose Top Faculty for Nagaland & Geo. 10+ Years of Experience	Sir Yiben Humtsoe Top Faculty for Nagaland & CSAT 10+ Years of Experience	Sir k. Sajal Civil Servant Excellent GS Faculty
Madam Sumi Saikia Excellent GS faculty 6+ years of Experience	Madam Arushi Rathi Top GS Faculty from Delhi 5+ Years of Experience	Miss Somduty Paul Excellent GS faculty 5+ years of Experience
Sir P J Nayak Top Polity faculty in Nagaland Expert in Essay & Answer enrichment. 6+ years of Experience	Sir Alam Prince Excellent G. Science faculty. 5+ years of Experience	Sir Hurato Top GS Faculty Expert in Geo-economy
		Sir Anthony Top History Faculty of Nagaland 10+ years of Experience

eduversityplus.com | Eduversitykohima@gmail.com | Kohima - Dimapur



Ranchi, July 08, 2024: Jharkhand Assembly nung Jharkhand Chief Minister, Hemant Soren-i State Assembly Speaker, Rabindra Nath Mahato agizükdang tangokba noksa nung angur.

J&K kübok Kathua district nung kiralongrartemi sepai 4 khaset

Srinagar, July 08 (Agencies): Hombarnü Jammu & Kashmir nung Kathua district kübok Machedi area nung kiralongrartemi Indian army convoy dak injang khaloktsüba sülen sepai aser kiralongrartem tsüngda khatep tenzükä liasü; iba rara nung sepai pezü khaset aser sepai trok yiruogo, ta army tem osang ka ajanga metetdaksü.

Defence ketdangsertemi ashiba agi, Hombar nikongdang 3:30 ako meta Kathua jila kübok Badnota yim anasa kiralongrartem jagi army tem gari dak grenade bomb ka tama mereploksüba sülen injang khalokja liasü. Sepaitemia kiralongrartem dak injang khaloktsü saka kiralongrartemji anasa aliba aremi jena ai.

Kiralongrartemji mita aotsü atema sepai tali yoksemogo. Kiralongrartemji tawa arrtsü adena aitba asütsüa akok ta sepaitemi bilemer.

Iba tatalokba nung yirur sepaitemji grenade aser injang amshia amakba gari nungji liasü. Yirua alirtemji military hospital kati anir ogo aser parnok rongnung anabo kanga mejungi lir.

Anogo ka tejaklena Jammu & Kashmir kübok Kulgam district nung sepaitem aser kiralongrartem tsüngda raradang kiralongrar trok khaset aser sepai anata asü. Sepai anaji aser sepai anata asü. Sepai anaji elite para commando liasü, ta ketdangsertemi metetdaksü.

Amongnü sepaitemi kiralongrar ana tasümgangji Modergam nung khatepba tesem nung angu aser kiralongrar pezü tasümgangji Chinnigam nung khatepba tesem nung angu.

June 9 nüa Reasi nung kiralongrartemi bus ka amakdang passenger 9 asü aser aika yirua liasü. Bus nungji Uttar Pradesh aser Delhi nungi temeshi aini J&K-i arurtem liasü.



TIR YIMYIM YIMOBILEM (EDITORIAL)

DIMAPUR SANGTENNÜ, JULY (CHITENI) 09, 2024

Sowar masü mitkar akümtsüla

Atangji nüchi purtemi sowar dang meima benshir saka tagitarutsü mapa nungbo kanga mezügmeshir, kechiyong sowar nemjibo pa tsüda lemzüka nungi asüyonga teraka agütsür tanünga ajakji nüchipurtemi agiyonga sowarsang jagi ola madoktsü. Iba amaji sowartem atema nüchi purtemi inyaktsüba mapajibo shitakbosa masütsü. Kasaji, nungdak adokba mapang sowar nemji sen mejimenuka agütsür süngtem longtem bendaktsü nunga pelashishia abentsü. Aji oda, aon tajung den chiyongdanga sowarsang auso nungbo aontsü den teret-ang ka enoktsüyonga bangdangbangdanga chiyongtsü. Tanü Nagaland nung asenok nübortem o asen government nung inyakertem na ya sowarsang o nüchi purtem na libaliruji mesüka lir. Aji oda, nüchi purtemi sowartem jajatsü yangluba lenmang nung lishi aiteta yutsür aser lenmang lendiji paidoka arem nema jajadaktsür. Ano, sowartem jajatsü yanglutsüba lenmang kar nungbo long mezüa alua süsüponger onseta südaktsür. Item lenmangtem nung timtem lendong ajuruba agi sowartem mapang shitak nung tounüleni moutetter aser aoyonga senotsü aser mapang tali endoker külenang tadongtsü ka atonger. Ajisüaka, nüchi purtemi sowartemji lenmang teyangludak nung asüyonga timtem takoksa majurutsüa inyaktsü atema kechikomaka lenmang inyakyim nung lateta ali aser senotsüa kwika enokja aliar itemji sowartem jagi memetet. Aji oda, sowartem jagi memetet aser tasüngdanga masüngdangtsü taji nüchi purtembo tagitsü tashi agizüka agir ayongayonga, ashiko, asen lima nunga masü bendang lima nung yimlusüa senzüa alitsüa akok. Kasaji, sowartem azüngtsü kaketreju nungbo tesayur shitak meyokyonga kecha masü, süoshi aser kaket shitak magütsüyonga kecha masü, anüngdang sowar chirnurtem chiyongdaktsütsü yokba chiyongtsütemjia magütsüyonga kecha masü, kechiyong sowarji sowar, shingai mebushitsü aser ola madoktsü. Aji oda, sowartem taneptsü angudak mozü kitem nungbo doctor aser nurse-tem dang masü yiptena magütsüyonga tebushir malitsü. Aji oda, parnok temang tendangtsü atema yokba machine-tema nüchi purtemi ajak yoka achiyonga sowartem memetettsü ! Iba amaji kibur tenüngbo sowarsang saka tagitarutsü aser tachitajemtsü agizükertembo nüchi purtem ta aliba lima kaji Nagaland ya ka asütsü. Atangji, alima asünungji itemji kecha tesüngmangtsü mali, kechiyong sowartem asoshibo mashika awazütsütsübaji meimchir yimya dak keta lir. Aji oda, sowartemji nüchi maküm tashi nüchi purtem jagi nüken metsübuttsü aser mezügmeshia dang amshitsü. Atangji, Nagaland nung aliba nübortem yabo sowar masü saka sowar ama kümer alirtem dang lir. Ashiko, ibaji anogo shia chiyongtsübo ngua tebok sünga aliba agi nüchi asüyonga sowar kümer ajemajema alir asütsüa akok. Ajisüaka, anogo shia pei bok sünga alitsü akokbatemjibo asenok nüchi ser nung sowar amai alirtem dang masü saka arem shiruru aser anüng ozütema peisasa pei boksüngbo nguteta taküm alir. Aji oda, asenok alima nung taküm aliba ya pei boksüng bushia alitsü atema alir masü saka pei boksüng bushibaji alima nung alirtem asoshi nungdak mapa inyaktsütsü asoshi bushia chiyonger. Iba taküm tetezü ya kodang angatetdir, yimten nung asenoki asen temeten bushi tenzüksü aser asenoksasa asen lima mitkar kümer alitsü. Idangjibo, asenoki asenok jajatsü lenmang yanglutsüba nunga asenok timmedemi jajatsüba temeten bushi tenzüksü aser asenok timtemdaktsüra temenok meshitsü. Kasaji, government nungi angutsüba tagitarutsü aser teyari kechisa ali itemji bushisüngdang tenzüksü. Idangjibo government-i lapokba kaketrejutem nung kaket aser süoshi dang masü saka kaketshisatsüa shitak angutsü aser taneptsü angudaka taneptsü angutsüa temang tendangba machine-tem dang masü anepalurtema shitak alitsü. Idangjiang, nübortem ket tonga tim tangutsü tagitarutsü ajak arutsü. Iba anogoji arudaktsütsüa nübortem ya pei temeten aser pei teinyaktsü mapa metetba senso aser mitkar kaka akümtsüla.

OLEMSABANG

ABAM-JI BAPTIST TESAYUBA (BAPTIST PRINCIPLE) NUNGI PILAR MASÜ NO?

ABAM Rongdak Inti Mungdang June 4, 2024 Impur nung senden dang tezüluba osang NO 15-

15 "ABAM den aliba Lim Arogo/Yimtsüng/Lokti/chir ka ama Molungyimsen Baptist Arogo, Molungyimsen Senso Mungdang, Molungyimsen village, Council ajanga ABAM anema The Civil Judge, Senior Division Mokochung nung case agüja aliba tekaratiba nung withdraw asütsü mepishitsü lemtet. ABAM aser lim Arogo/yimtsüng/lokti/kija tsüngda mangatetep makai yimjung nung külemi longjemer aotsü nükla nung iba temepishiba shiti zülutsu lemtet. Iba temepishiba magizüktetra ABAMi lemtetta aliba dak ajemdaker amalitep makatsü (SLT/2020-07)."

Mezüng oren nung zülüoka aliba- Molungyimsen Baptist Arogo, Molungyimsen Senso Mungdang aser Molungyimsen Village Council-temji ABAM chir ta angatet aser amanga alinungbo iba basajagi ABAM-i Baptist tesayuba nungi kenyongi piladoker. Aser ibaji Baptist tamangba nükmen nung aibelenba lir, kechiyong Baptist tesayuba nung Arogoji Tsüngremi yangluba telok (Divine made) aser Mungdangji nisungi yangluba lokti tentet (Man made Association). Arogo kaji pei sasa yimsü asüba lokti (independent Church) aser iba madak Khrista dak alaka shinga/kecha tashi mali. Mungdangi (ABAM) Arogo nungitta yaritsüba dak alaka Mungdangi Arogo nem ozüng mesura obendang agütsütsü makok. Anungji yim Arogo, Senso Mungdang aser Village Councilji ABAM chir ta angatetta amanga anitsü merang nungbo ABAM-ji tiyazü sayutsüngir telok akümtsü menua mali.

Tanabuba oren nung ABAM anema Court nung case agüja alibaji tekaraba nung withdraw mesüra ABAM-i item denji amalitep makatsü ta lemtetbaji Senso ka temeden (fundamental rights) nokdangba/amokmerenba telemtetba lir. Democracy lima ajak nung iba temedenji temzüngi agüja amshitepba tensa mapangren nung iba temeden mamshidaktsütsü/ nokdangtsü ABAM registered-a masüba volunteer organisation ka nem shiba/kong nungi agüja aliba tashi amshitsü ratet/lemtet kanga junga shisadangtsü telemtetba agiogo no!

Tanabuba onükji Mungdang tezüluba osang NO 13- "Courti maoba ajanga kechi khuret aser timtim arudir itemji ABAMi aremstsü. Iba ya nija khuret masü saka Aor tamangertem ajaki abentsü."

ABAM Mungdang nung Ao Arogo shia nungi teshimtet kar atenshia lemtetbajagi Aor tamanger ajak alentsü makok. Parnok ishika jagi Arogo nungger ajak meyongtsü makok ta Baptist tesayuba jagi tuyur. Arogo tenüng nung nisung ishika jagi nangzüktsü aser inyaktsü makok, kechiyong Arogoji Tsüngremi yangluba lokti tentet koba nisungi yangluba lokti nung züngsem akümtsü Baptist tesayuba jagi memelar. Anungji Mungdang nung arua atener dak alaka par Arogopur shinga alensemstsü memelar. Courti aoba tetezü ochi O bushi aorba aser iba ochi bushir nokdangtsü/amokmerentsü ABAM nem tashi agüja mali ta angajemtsü nungdaker masü no?


Temalen shisemba onük ana ya teka metongtepba, azüzüktepba, tai dokteptsü mesüra O-leptepa jembitepba onük masü saka, Baptist tesayuba nung zülüoka lir mali ta angajemtsü onük dang lir.

~ TAKUYABA, Aongza Ward, Mkg. Town

~ TOSHI JAMIR, Aongza Ward, Mkg. Town

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Australia nung Will Graham sentong nung aikati Khrista agizük



Billy Graham, par jabaso Franklin Graham aser par semchir, Will Graham nung nung angur.

July 08, 2024: Australia nung Queensland kübok Gold Coast nung Evangelical sentong "Look Up Celebration" nung nisung aika aden aser noklang aikati Khrista agizükogo.

Gold Coast Convention & Exhibition Centre nung ayongzükba sentong nungji sayutsünger, Will Graham-i Tsüngrem O jembia liasü.

Will Graham ya sayutsünger, Franklin Graham'er jabaso tambusang lir aser nungtugu sayutsünger, asür Billy Graham'er semchir lir.

Australia nung iba region ya aiben Miami mesüra Las Vegas den atishitepa jembir, kechiyong raliwalirtemi kanga sapua iba region semdang.

Honibar (July 06, 2024) aonung iba sentong nung

jembidang Will Graham-i, "Nisung aikati Tsüngrem ajurutsü atema lenmang aika lir ta amanger, ajisüaka Laishiba-ibo yamaji mashir. Yisu-i yamai ashi, 'Lenmang, atangji aser taküm Ni. Ni ajanga mesüra shingai Kubü dangi maotsü' ta ashir. Tsüngrem dangi aotsü lenmang ka dang lir, aser ibaji Par Jabaso, Yisu Khrista ajanga dang lir. Kangki nung Pa azü ayim aser na aser ni Tsüngrem den tesendaktep lidaktsütsü atema Pa asü," ta metetdaksü.

"Nisungtem ket nung sen, degrees aser rongsen lir saka parnok aika tanela samar nemzudar. Na-a lenmang bushia nemzudar asütsü akok. Taonung Tsüngremi na Pa dangi kidangi arudaktsüner," ta Will Graham-i metetdaksü.

Iba sentong nungji nisung noklang aikati Yisu Khrista agizüka Pa sülen anidaktsü melungteta sentong agiba sabangleni ao, ta Billy Graham Evangelistic Association (BGEA)-i metetdaksü.

"Look Up Celebration," sentong atema Arogo 380 aser volunteers 1,000-i yaritepa liasü. Iba sentong nung yaritepertem rongnung Christian Life & Witness Course densema liasü.

Iba sentong nung yariteper counselor, Trinity-i, "Iba sentong ya asentenshi milak jangruba sentong ka amai liasü. Tanela jenti kümzükba ama sayatenya kecha mali. Taonung asenok yangi benjungtepba dang masü saka kodak nunga benjungtepdar," ta ashi.

Iraq nung Khristantem atema tensa tajungba kümdar

July 08, 2024: 2014 küm Islamic State kiralongrartemi Iraq nung Khristantem aser minorities anema inyakba sülen joko küm ter jungnüa arudang iba linük nung Khristantem atema tensa tajungba kümdar, ta osang ka ajanga metetdaksü.

Küm 10 tejaklen IS kiralongrartemi Iraq nung Mosul, Sinjar aser Bashiqa yimitem den külemi Nineveh Plains nung jila aser yimtsüngtem aika atsünga liasü, aser ibaji ajanga Yazidis, Kakais, Shabaks aser Khristantem aika takoksa angu.

Iba mapang nungji Khristan 120,000 shi jenshi. Khristantem dang Islam yimsü agizükang mesüra saru agüjang mesüra nenok tepsettsü, ta metetdakja liasü.

2014 küm tatalokbatem Khristantem melungjang nung tang tashi lir, ajisüaka Iraq nung aliba Khristantem tsüngda tesendaktep tajung aliba ajanga küm ter tejaklen temelung yiruba zübo anepdar, ta Khristan lenirtemi lemsatep.

Archbishop Semaan aser Archbishop Warda nati Hadiab-Erbil nung Syriac Catholic Eparchy Archbishop, Nizar Semaan dang Iraq nung Khristantem tarutsü tia tajungba akümtsü imlar, ta metetdaksü.

"Onok olive süngdong amai

lir; onok dak kechi atalokdir atalokaka onok olive süngdong ama lir. Parnoki ajak lepsatsütsü akok, ajisüaka onok yangi lir aser onok yangisa alitsü. Arogo ka ama onoki nüburtem (Khristantem) yangi iba lima (Iraq) nung alitsü atema parnok nem teyari agütsütsü aser teimla temaitsü agütsütsü," ta Archbishop Nizar Semaan-i metetdaksü.

Iraq nung nütsüng shilem 98 bo Muslim nungertem lir, ajisüaka iba linük nung Khristantem tesüiba küm 2,000 dak tema alir.

Akhidang Yisu nütsüng Toma-i mezüng Iraq nung Khrista osangtajung proka liasü ta amanger.

Aid to the Church in Need (ACN)-i ayongzükba sentong ka nung jembidang Archbishop Semaan aser Archbishop Warda nati, Iraq nung Khristantem atema tarutsü jenjang tajungba akümtsü, ta lemsatep.

1947 küm tentetba ACN telok yagi alima tesem balala nung reshikangshi ajangshiba Khristantem yarir. Pope Francis leniba nung ACN-i küm shia linük 138 nung project 5,600 shi inyaker.

2017 küm Iraq-i Islamic State madak takok anguba sangdonga liasü. Iba mapang nungjagi tenzüka Chaldean aser Syriac Catholic Arogotemi Iraq nung

Arogo taneban asentenshia yangershiba nung yarir.

2003 küm Iraq nung Khristan nütsüng million 1.4 shi liasü saka tanübo iba linük nung Khristan 250,000 shi dang anünga lir.

Iraq nung Khristantem atema tensa tajungba kümogo ajisüaka Israel aser Hamas na tsüngda rara ya tuluba küma Middle East tesem ajaklen prokshira Iraq nung asentenshir Khristantema timtemtsü südi, ta bilemer.

Archbishop Warda-i, "Israel-Hamas rara ya tuluba küma prokshira Khristantem anema inyaktsüa akok mesüra teraksatsüba tulu alitsü," ta metetdaksü.

Archbishop Semaan-i, "Tangbo Iraq nung tensa terabo süngjemogo. ISIS ya army dang masü saka tangatetba balaka aliba telok lir. Parnoki tanga yimsütem magizükteter," ta ashi.

Archbishop Warda-i, Khristantem aser Muslim nungertemi parnok tsüngda tesünep nung alitsü jangrar saka Allah tenüng nung takoksa angurtem dang Muslim nung lenirtem aser shisashirtemi tatok memeshitetba ajanga timtem ajurur, ta ashi.

2021 küm Pope Francis-i Iraq semdangba ajanga iba linük nung aliba Khristantem kanga ajangzükba liasü.

ANOGO ABEN TSÜNGREM DEN

Tsüngrem mesükba den putepa

"Kechiaser Tsüngremi mulungba ya, oda nenok temeshitetba" (1 Tesa. 4:3).

Asenok nem agütsüba ozüng alizüngji "Temulung temerük aser mulungsentsü tajung anemsü maliba tamang nungi adokba temeim atema lir" (1 Tim. 1 :5). Tsüngrem mesükba den sütepa melira Tsüngrem leniba item den madentsü.

Laishiba asenok kong alitsüla aser shiba den satitsüla shia mali. Saka külem inyakertem den aser asenok shir den alir parnok den tesendaktep junga alitsü indang Lai nung teperi shia lir (Kol. 3:22-25). Kati ka den sendaktepa alitsü (Kol. 3:1-14) aser kibong nung (Kol. 3:18-21) Tsüngremi mulungba inyaktsü. Tetezü Tsüngrem den aser kiyonger den putepa alitsü indang Laishiba nung sayur, "Nai Kibuba ne Tsüngrem ne mulung ajak agi, ne tanela ajak agi aser ne tashi ajak agi meimtsüla... Aser nai ne kiyonger na ama meimtsüla. Item ozüng ana nung ozüng aser ainkar 0 ajak itaka lir" (Mathi 22:37-39).

Laishiba nükjidong ajungaji Tsüngrem den koda sendaktepa alitsü aser kati ka den koda putepa alitsü aji sayur. Asenoki iba Tsüngrem dak amanga inyaker.

Tsüngremi jatetba nisung ka na asütsü mulungtetang. Na alema shingai na Tsüngremi ajaba nungi nokdangtsü makok. Kibuba, tanü ni Nai ajaba nübu ka süner, Ne den aser ni meketa alirtem den putepa linür ta asenoki shidi.

Tenyartem Mapa kakat nungi series adoktsü tebilemba lir: Dallas Jenkins



July 08, 2024: 'The Chosen' kanga tongtibang mapang director, Dallas Jenkins-i pai indang otsü maneni ashitsü ni Laishiba nung Tenyartem Mapang kakat nungi series adoktsü tebilemba lir, ta metetdaksü.

Jenkins-isa, "The Chosen tembangba sülen ni küm ka shi anisüngzükba mejangtsü. Laishiba otsütem aika lemsateptsü anünga lir, kechiyong nisungtem nungi takhangba lir," ta ashi.

The Chosen Season 4 July 1 nü Prime Video nung tenzüka liasü.

Ano külen Jenkins indang tanga project—"The Best Christmas Pageant Ever" indang official trailer aser poster July 1 nü sayaogo. Khristmas film ya 'The Best Christmas Pageant Ever' kakat nung ajemdaker yanglu aser taküm November 8 nü theaters nung sayatsü.

Jenkins-isa, "The Chosen tembangba sülen ni küm ka shi anisüngzükba mejangtsü. Laishiba otsütem aika lemsateptsü anünga lir, kechiyong nisungtem nungi takhangba lir," ta ashi.

The Chosen Season 4 July 1 nü Prime Video nung tenzüka liasü.

Ano külen Jenkins indang tanga project—"The Best Christmas Pageant Ever" indang official trailer aser poster July 1 nü sayaogo. Khristmas film ya 'The Best Christmas Pageant Ever' kakat nung ajemdaker yanglu aser taküm November 8 nü theaters nung sayatsü.

AO OSHI ANGAZÜKDAK:

TANÜ ANGAZÜKTSÜBA OJANG



Tajangzük

(n) mapa inyakba nungi tagitsü aser temoatsü anguba (profit)

* Tsüngrem tenzükba mapa nung tajangzük tulu lir.

Tajem

(adj) makong, ano maro (not dry, fresh)

* Süng tajem atsükdang mokozü kanga adoker.

OLONG PAITEP # 6841

Grid for crossword puzzle #6841 with numbered squares.

TIPLÉN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S___i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 6840 TELANGZÜBA

TIPLÉN :

- 1. Tanga, 6. Wara, 7. Rajang, 9. Anük, 10. Jenjang, 11. Alar, 14. Ngashi, 15. Nala, 16. Mechi.

LANGTSÜNGLEN :

- 2. Anga, 3. Yabang, 4. Tarok, 5. Orak, 8. Ainer, 9. Anema, 10. Jabili, 11. Among, 12. Miim, 13. Anem.

NAI-A YA METETTER MA



Ukraine nungi high jumper Yaroslava Mahuchikh-i alima otsü ka yanglutetogo. Paris nung Diamond League nung women's high jump tetoktepba nung Yaroslava-i 2.10 meters otsü tasen yanglutet. Paris Olympics amongtsü hopta asem shi dang lia lai iba otsü yangluogo. 1987 nung Bulgaria tsür Stefka Kostadinova-i Rome nung world record yangluteta aliba Yaroslava Mahuchikh-i 1cm agi ajatetogo.

Assam tzümetsüng nung tasür 66 jungogo; Lakh 22.7 timtemer



Guwahati nung tzü agi gari lenmang mobanga alidak nisungtem senzüba angur.

Guwahati/Silchar, July 8, 2024 (Agencies): Assam nung tzümetsüng tensa tamajungba akümer aser tang tashi lendong balala nung nisung 66 taküm samaogo.

Tesüiba ghonda 24 tsüngda Dhubri aser Nalbari nung nisung anana aser Cachar, Goalpara, Dhemaji o Sivasagar nung kaka asü.

Taküm küm tzümetsüng, anentsüh aser yipru nung nisung 66 tashi süogo ta tesüiba ajanga ashi.

Rowmari Pathar nung ali anenzükba aser tzümetsüng ajanga kibong 500 jungnüa ki raksaogo.

Tzümetsüng agi kanga mejungi kongshiba Barpeta district nung yimtsüng 179 tashi tzü agi metsübanga lir aser nisung 140,000 jungnüa timtemer.

Assam nung tzümetsüng ajanga 63,490 hectares nung tsünüsenbongtsü raksatsüogo.

Tzümetsüng ajanga district 30 nung nisung lakh 20 tema timtemer.

Rahul Gandhi-i Assam tzümetsüng atema tebilemsts abener

Lok Sabha nung Leader of Opposition (LoP) Rahul Gandhi-i Hombarnü Assam nung tzümetsüng ajanga takoksa bentsür aruba atema temulung raksaba metetdaksü.

Silchar airport nung Rahul Gandhi-i Assam state Congress President Bhupen Kumar Borah-i anir teshimtet telok ka den ajurutep. Idangji parnoki pa dang tzümetsüng ajanga takoksa asr timtem bentsür aruba osang lemsatep.

"Assam nung tzümetsüng ajanga takoksa bentsür aruba osang angashia temulung raksar. Asenok dang nungi arishi küm 8 Avinash pilaba osang angashi temulung shiranger. Assam nung tasür kibong ajak den asükhu

lemsateper" ta Rahul Gandhi-i ashi.

"Assam tzümetsüng ajanga nisung 60 tema asüba, nisung 53,000 talidak maka akümba aser nisung lakh 24 dak kongshiba ajanga BJP double-engine government ajanga teinyaktsü tim meinyakba sayur, kechiyong parnoki flood-free Assam nangzüka sorkar akümtsü tashi angu" ta pai ashi.

"Assam-i asalentong tajung ka nüngdaker. Relief, rehabilitation & compensation tajung alitsüla aser pan-Northeast water management authority kati tzümetsüng azüoktsü atema mapa inyaktsü nüngdaker" ta Rahul-isa ashi.

"Ni Assam nunger den külemi noktaker. Parliament nung ni parnok ateam sepai lir aser Centre sorkar dang akokba tashi Assam nem teyari agütsütsü ayongzüker" ta paisa metetdaksü.

Mizoram CM-i Taiwan Universities den MoU nung sign sütep

Aizawl, July 8, 2024 (Agencies): Mizoram Chief Minister Lalduhoma-i Taiwan nung university balala den Memorandum of Understanding (MoU) sign sütepba osang metetdaksüogo.

Iba tenangzüktep ajanga Taiwan, India aser Mizoram tsüngda amalitep tajungba akümtsü aser tejakleni aotsü imlar ta CM Lalduhoma-i ashi.

"University tem tsüngda

MoU sign sütepogo. Iba ajanga Taiwan, India aser Mizoram tsüngda tesentaktep akangshitsü imlar" ta CM Lalduhoma-i ashi.

Lalduhoma-i July 6 nü New Delhi nung Prime Minister Narendra Modi aser Union Minister Kiren Rijiju na den senden balala amen aser idangji Mizoram nung terenlok maparen balala indang osang lemsatep.

"Mizoram Chief Minister Lalduhoma-i Prime Minister

Narendra Modi den ajurutep" ta Prime Minister's Office (PMO)-ia metetdaksü.

PM Modi den ajurutepba sülen Lalduhoma-i Union Minister Kiren Rijiju den ajurutep.

"Tanü New Delhi nung ozü kidang Mizoram CM Lalduhoma den ajurutepogo. Pa den ajurutepba atema kanga pelar aser Mizoram nung terenlok maparen balala indang lemsatepogo" ta Rijiju-ia metetdaksü.

Manipur nung ITLF-i Rahul Gandhi dangi shidi ka zülu

Imphal, July 8, 2024 (Agencies): Kuki-Zo nunger telok Indigenous Tribal Leaders' Forum (ITLF)-i Leader of the Opposition Rahul Gandhi dangi shidi ka züluogo.

Rahul Gandhi-i Manipur nung ozüng alema inyakshangshiba anendaksütsü merangba atema pelaba den Manipur state sorkar kübok Kuki-Zo nungeri timtem ajuruba onüktem iba shidi nung zülüa lir.

"Ozü nübortem telungpur telok dang nungi lendong ajurutsü tia ka nung alir. Parnoki kiojen, tekülem ki aika raksatsüogo aser nisung aika pei talidak nungi odaksüogo" ta ITLF Chairman Pagin Haokip-i shidi nung ashi.

Kuki-Zo nunger alidak essential supplies meyokba den terenlok mapa meinyaker ta pai ashi.

Kuki-Zo nungeri mapa inyaktsü aser shisaliok bushitsü atema state yimtibai mouteter,

ta ITLF General Secretary Muan Tombing-ia ashi.

Congress party manifesto nung Kuki-Zo nunger nem temeten agütsütsü aser rongsenketzüng-lokti jenjang ajungkettsü nangzüka ama inyaktsü ayongzüker ta ITLF-i Rahul dang ashi.

Rahul Gandhi lenisüba ajanga onok timtem agientsü aser Manipur tebilemsts atema telatetba tajung ka yanglutsü imlar ta ITLF-isa metetdaksü.

SANGDONGER



Küm ishika Mopungchuket yimden aser Kelingmen yimden tsünga Enki shia liasü. July 6, 2024 anogo nung tangatettep tajung arua, Enki lapoka yimjung yangluba tepela takok osang sangdonger.

Sd/-
Pastor
Mopungchuket Baptist Church

Sd/-
Pastor
Kelingmen Baptist Church

Russia-i Ukraine amakdang tanur mozüki nung kongshi, 24 asü

Kyiv, Chiteni/July 08 (Agencies): Russia-i Ukraine linük tesem balala amakdang nisung 24 takum sama aser Kyiv nung tanur indang mozüki ka kanga sashia raksatsü, ta ketdangsur temi ashir. Kyiv nung nisung 10 shi takum sama, kong taoba mapang anügdang iba yimti nung amakba aibenbo ajurua meliasü. Ohmatdyt Children's Hospital nungi video footage sayuba nung iba mozüki tuluka raksar liasü aser yimti indang mayor-ia yangji nisung asü-amaba lir ta ashi.

Kryvyi Rih, Sloviansk, Kramatorsk. Missiles balala 40 dak tema. Nisung aliba ki, ki o jen aser tanur indang mozüki ka raksa," ta Zelenskyy-i ashi.

Ukraine yimtiba Kyiv tesem ajungalen mokozi adoka aliba aser Okhmadyt children's hospital telung aser temalen teraksa aliba video tem social media nung lemsatapa liasü.

Mozüki teraksa agi nisung aika nembanga lir, ta Zelenskyy-i social media post ka nung ashi.

Mozüki indang cancer aser intensive care wards nung kongshi, ta Health Minister Viktor Lyashko-i ashi. Iba tesem nung tangokba noksa tem nunga tila tanurtem IV drips inoker mozüki kimalen mentepa liasü.

Rara tenzüker Hombarnü linük yimtiba nung bomb pokloktsüba ya tesashitiba rongnung ka liasü, ta Kyiv indang mayor Vitaliy Klitschko-i mozüki nungi osangbener dang ashi.

Kryvy Rih nung military administration tekolakba Oleksandr Vilkul-ia yimti nung

nisung 10 tepset aser 31 yiru, ta Telegram nung ashi.

Kryvy Rih ya Zelenskyy soa intetba jila lir aser Russia-i 2022 küm February ita nungi tashi ajak amshia Ukraine amakba mapang iba yimti nunga aiben makogo. Dnipro yimti nunga nisung ka asü aser trok yiru, ta Dnipro regional head Sergiy Lysak-i ashi.

Anüdoklen Donetsk region kübok Pokrovsk nunga nisung asem tepset, kong Russian sepaitemi tawa yimtsünga aika amokbanga lir.

Tang tashibo Moscow-i Hombarnü Ukraine amakba indang mashi saka taoba mapang mitkar temi civilian ki o jen mamaker ta shia liasü.

Ajisüaka Russia-i asendenshir tawa tayimtsü amshia amakba nung civilian tem asü-amar tali kumogo, ta Ukraine nung aliba UN indang human rights monitoring mission ajanga ashi.

Zelenskyy-i anüolen tembar linüktem dang air defence systems tali agütsütsü ajungshia arur.

France PM Attal mapa nungi anenba Tir Macron-i magizük



Paris, Chiteni/July 08 (Agencies): Hombarnü France Tir Emmanuel Macron-i linük ato kilonser mapa yutsüba magizük aser pa dang election nung sorkar ka kumtetsü mejangjateti aliba mechi khen asoshi sorkar tekolakba mapa bona atatsü ashi.

largest economy aliba linük ya marakzüteti akumtsü tia anasa lir.

Jelia election agiba ajanga France nung tejangja sorkar ka kumtetsü ta bilema Tir Emmanuel Macron-i election agitsü telemtetba agia liasü, saka result nung pai bilemba ama masü. Paris Olympics tenzüksü hopta asem majungdang iba teblemetsü ya arur.

Ato Kilonser Gabriel Attal-i nungdakra ato kilonser mapa inyaka atatsü ta ashi saka Hombarnü pai mapa yutsür ta shia liasü. Ajisüaka ita tenet

jakdang pa shimsang Macron-i pa dang linük azüoktsü mechi menden nungi malui atatsü ashi.

Macron-i ajungbena election ayongzükba nung pai memulungi liasü, ta Attal-i Deobarnü jangja-jangja shia liasü.

Voting round anaben agiba nung vote timtiba ngutetba leftist coalition, Macron'er centrist alliance mesüra far right teloki sorkar kumtetsü lenmang tejangja mesayuteter.

Left-wing lenir Jean-Luc Melenchon-ibo par teloki sorkar kumtetsü renema lir ta ashi.

Menden 577 aliba National Assembly nungya Melechon-i aniba New Popular Front (NFP) coalition aser par allies temi menden 187 nung takok ngua liasü.

Tir Emmanuel Macron'er centrist Ensemble alliance yagi menden 159 angu aser Marine Le Pen'er far-right National Rally (RN) aser par allies temi menden 142 nguteta liasü.

Japan aser Philippines na defence pact ka yangluogo

Manila, Chiteni/July 8 (Agencies): Japan aser Philippines na defence pact ka nung sign süogo aser iba ajanga linük anapronglia pei sepaitem kati ka dangi yoktetsü. China military tashi renlokyonga aoba mapang ka nung tang linük ana yagi iba jenjang agiogo.

Hague nung international tribunal kati 2016 küm Beijing-i iba tzüym parnok meyong ta ashiba ya temzüng ozüng kübok kecha tamendakdak maka ta ngutetogo.

Japan indang Minister of Foreign Affairs Yoko Kamikawa aser Secretary of National Defense Gilberto Teodoro nati Hombarnü Manila nung sentong ka agiba mapang Reciprocal Access Agreement nung sign süa liasü.

China aser Philippines nung coast guard aser navy tem mangatettep adoker aliba tzüym nung aiben mangatettep adoka arudar, kong taoba ita China nung coast guard temi kotari aser nü bener motorboat amshia Philippine navy supply rong ana dak tsüka liasü.

Tenangzüktepba kübok Japan nung sepaitem joint military exercise balala atema Philippines-i yoktetsü aser Philippines nung sepaitema Japan nung combat training agitetsü.

Kasa mapang nung Japan aser China na Senkaku asetkong dak sendakba nung mapang talangka mangatettep adoka arudar. Iba asetkong ya Taiwan aser Okinawa na yongtsü nung lir.

Ajisüaka iba tenangzüktepba tasenba ya mapa küma inyakyonga aotsü atema linük anapronglia legislatures-i temelaba agütsütsü nungdaker.

Japan Ato Kilonser Fumio Kishida lenisüba nung Tokyo-i military tashi ajungkettsü atema jenjang agiogo, kong Australia aser United Kingdom na den tenangzüktepba yangluba densema lir.

Japan aser Philippines napronglia ya mapang talang nungi United States den sendaktepa lir, aser parnok temeket nung China-i tashi tali amshiba mapang ka nung tang iba tenangzüktepba ya yangluyogo.

Philippines tir Ferdinand Marcos Jr-i, South China Sea nung China nung inyakyim aitsüogo, aser parnok ket nung Philippines nung ka danga taküm samara aji rara nung inyakyim ka ama züngshitsü ta tekümdangtsü metetdaksüogo.

Beijing-i South China Sea shilem 90 dak tema parnok meyong ta ashir, kong Philippines aser Southeast Asian linük pezü indang exclusive economic zone densema lir.

Manila mapang talangka nungi Australia aser US na den defence dak sendakba nung tenangzüktepba balala yanglur arudar aser tang France dena kasa tenangzüktepba yanglutsü merangdar.

Indonesia nung hon atudak ka anenbang, nisung 11 asü

Jakarta, Chiteni/July 8 (Agencies): Indonesia kübok Sulawesi asetkong nung ozüng alema inyaksangshia aliba hon atudak ka anasa tzünglu kanga sashia aruba ajanga anentsü tulu ka alua nisung 11 asü aser nisung 45 samar bushidar, ta ketdangsurtemi metetdaksü.

Yimdaklir 79 ongken ka nung hon bushia aliba mapang tenem nungi anentsüh alua parnok idakji anenbang, ta Heriyanto-i ashi.

Gorontalo province kübok Bone Bolango district nung Deobarnü anentsüh aluba sülen hon aturtem aser hon atuba tesem anasa alirtem süogo, ta local rescue agency Basarnas tekolakba Heriyanto-i Hombarnü ashi.

Pai ashiba agi, tekümkertemi nisung 23 taküm lia atsütetogo aser tetsür ana aser arishi küm 4 tain tebur chanu ka densema tasümgang 11 agitetogo. Maneni nisung 45 samar bushidar, ta pai ashi.

"Samar alirtem bushitsü atema onoki personnel 164 yokogo, kong national rescue team, police aser military personnel tem densema lir," ta Heriyanto-i ashi.

National Disaster Management Agency otongdar Abdul Muhari-i ashiba agi, iba tesem nung Honibarnü nungi tzünglu kanga sashia arur aser iba ajanga embankment ka pokdanga Bone Bolango nung yimtsüng pongu metsüngogo. Tzümetsüng ajanga ki 300 shi dak kongshioogo aser nisung 1000 dak tema jenshiaogo.

Ajisüaka lenmangtem lishi agi melem melema mobanger aliba aser iba tesem nung tzünglu maneni aruba ajanga tekümkertem km 20 shi tetsüng agi jajatsüsa akümer, ta Heriyanto-i shisem.

Indonesia indang National Agency for Disaster Countermeasure-i, Gorontalo province nung Hombar aser Mongolbarnüa tzünglu kanga arutsü imlar ta shia iba tesem nung alirtem nem tekümdangtsü metetdaksüogo aser nüburtem dang kümküma alitsü mepeshia metetdaksüogo.

"Onoki kadang amshitetsüsa kümdir idanggi excavator amshitsü merangtsü," ta pai ashi.

Bavuma lenisüba nung S Africa team West Indies den asayatsü



Chiteni/July 8, 2024

(Agencies): Küm ka masayai lir Temba Bavuma maneni international cricket asaya nung asayatsü renema lir. Pa lenisüba nung South Africa team West Indies den Test asaya ana asayatsü, koba taruba ita asayatsü.

Bavuma mapang talangka masayaba dak sendakba nung coach Shukri Conrad-i, tanü asüng cricket asaya white-ball format tem dak dang tali rangloker asayaba ajanga Bavuma national team nungi mapang talangka masayatet ta ashi.

Durban nung taruba pre-tour camp atema Conrad tetsükdaksü adoktsü, kechiyong team nungi asayar 16 rongnung tesadang dang iba camp nung shilem agitsü, kechiyong parnok white-ball

cricket aser English county season nung asayatsü renemer lir.

Bavuma taoba küm December ita India den mezüngbuba Test asayaba mapang yirua liasü aser iba ajanga pa tanabuba Test nung masayatet. Pa masayaba asaya nung Proteas pur kanga mejungi tamakok ngua liasü. Tanabuba Test nung parnok anogo ka ser tesadang nung dang India-i akok.

Iba sülen Bavuma ano New Zealand den Test asaya ana asayaba nunga shilem magitet. Iba asayamung nunga SA team-i asaya anaprongla makok, kechiyong contract agütsür aliba asayartem SA20 nung asaya liasü.

Maneni pa T20 World Cup nunga masaya, kong SA pur tanabuba jenjang nung

tembanga liasü.

South Africa nung asayar timbaka tang United States nung Major League Cricket asayamung nung shilem agidar, koba July 28 nü tembangtsü. West Indies den asayamung atema shimer aliba asayartem Caribbean-i indang indanga aotsü aser iba ajanga parnok mezüngbuba Test masaya tsüngda warm-up ka nung shilem agitsü maongka agütsütsü.

Team nung arishi küm 25 tain asayar Matthew Breetzke dang asayar tasen asütsü. Pai T20 internationals trok nung asayaogo aser tang English county nung Northamptonshire nungi asayadar.

South Africa team: Temba Bavuma (captain), David Bedingham, Matthew Breetzke, Nandre Burger, Gerald Coetzee, Tony de Zorzi, Keshav Maharaj, Aiden Markram, Wiaan Mulder, Lungi Ngidi, Dane Paterson, Dane Piedt, Kagiso Rabada, Ryan Rickelton (wkt), Tristan Stubbs, Kyle Verreynne (wkt)

Fixtures:

* July 31-August 3 - West Indies Invitation XI, Tarouba, Trinidad

* August 7-11 - First Test, Port of Spain, Trinidad

* August 15-19 - Second Test, Providence, Guyana.

Olise küm 5 atema Bayern nung denogo



Chiteni/July 8, 2024

(Agencies): Bayern Munich-i, Crystal Palace nungi winger Michael Olise euro million 60 shi agi alizükogo.

Olise, shiba 2021 küm July ita Reading nungi pound million 8 yong Palace nung dena liasü, pai Bayern den küm pongu atema tenangzüktepba yangluogo.

Chelsea aser Newcastle United napronglai pa alizükna liasü, saka winger yagi Germany-i aotsü telemtetba

agiogo, kong pa Bayern indang manager tasenba Vincent Kompany kübok asayatsü.

“Iba amala club tulu ka nungi asayatsü atema ni kanga pelar. Iba ya tayongzükba tulu ka asütsü, koba ni janngar,” Olise-i ashi.

“Ni iba jenjang nung nia asayar tajung ka ta sayuner aser taruba kümtem nung takokba tashi title tem abentsü atema kü shilem inyaksü,” ta pai ashi.

Taoba season Palace nungi Premier League nung asaya 19

nung asayaba mapang Olise goal 10 idakja liasü.

Kasa mapang nung pa iba ita tatemlen Paris nung asayatsü aliba Olympics atema France team nung züngoksemogo.

“Michael-i Crystal Palace atema kechi ajangzüktogeto, iba atema onok kanga nema adanger, kong pa asayar ka ama kanga renlokogo,” ta Eagles chairman Steve Parish-i ashi.

“Pa temaba jenjang nung asayatsü tejangraba aliba onoki akümtsübur,” ta paisa ashi.

Bayern-isa, Fulham nungi Joao Palhinha alizükogo. Pa alizüksü atema pound million 42 den add-on pound million 4 agütsüogo.

Arishi küm 28 tain Portugal nung midfielder ya taoba küm Bayern nung adentsü liasü, saka tatembangbuba anogo tenangzüktepba yanglutsü renemer aliba chirep.

England defender Eric Dier-iba Bundesliga club nung denogo. Pa January ita Tottenham Hotspur nungi loan nung oa Bayern nungi asaya liasü.

Bayern puri küm 11 tashi German title bena arua aliba taoba ita Bayer Leverkusen-i tembangdaksüogo.

Mumbai City FC-i Lalhlimpuia den tenangzüktepba yangluogo

Chiteni/July 8, 2024

(Agencies): Mumbai City FC-i sangdong ka ajanga Daniel Lalhlimpuia den tenangzüktepba yangluba sangdongogo. Club aser Daniel na küm ka atema tenangzüktepba yangluogo aser 2024-25 season tatem tashi asayatsü.

Mizoram nungi arishi küm 26 tain asaya ya pa indang football career Chandigarh Football Academy nung tenzük aser iba sülen AIFF Elite Academy-i ao. Pa youth level nung national team balala nungi asayaogo. Pa U-19 team captain liasü aser 2016 küm senior national team nungi mezüngbuba asaya liasü.

Club jenjang nung pa mezüngbuba I-League nung Bengaluru FC nungi asaya liasü. Pa Indian Super League nung Chennaiyin FC nungi mezüng asaya aser iba sülen Delhi Dynamos, Odisha FC, aser Punjab FC nungi asayaogo. Pai tang tashi nung asaya 130 dak

tema nung asayaogo.

Mumbai FC den tenangzüktepba yangluba dak sendakba nung Daniel Lalhlimpuia-i, “Mumbai City FC nung adenba ya kü nükjidong atalokba ka lir. Club nung ni linük nung asayar tajungtibatem den training agitsü yongya atar. Ni kü taküm nung Mumbai City den tapak tasen ka lapoktsü aser taruba season nung team takok asoshi takokba tashi teyari agütsütsü matateter,” ta ashi.

Kasa mapang nung Mumbai City FC Head Coach Petr Kratky-i, “Daniel ya sempet tajung aketba asayar ka lir. Pa onok asayaba yimya den kanga tapet asütsü aser meranga inyaksü pa bendanga agütsür lir. Pa ya club attacking unit nung tongtibang asayar ka asütsü ta amanger aser pai onok nükjidong tongtettsü atema teyari agütsütsü. Onoki Daniel pelashishia agizüker aser pa den inyaksü yongyaseta atar,” ta ashi.

Sanath Jayasuriya Sri Lanka coach kümogo



Chiteni/July 8, 2024

(Agencies): Taoba mapang Sri Lanka nung nungtu cricket asayar Sanath Jayasuriya-i Hombarnü sangdong ka ajanga pa Sri Lanka national cricket team head coach akümtsü ta shiogo. Chris Silverwood-i mapa toktsüba sülen Jayasuriya shimogo. T20 World Cup nung team kanga kara tsükatokba sülen jurila nungdaka kar lir ta shia Silverwood-i coach mapa toktsü.

July 21 nü T20 Lanka Premier League tembangba sülen Jayasuriya mapa tenzüksü.

“Coach mapa abentsü atema kü dang asüngdang aser ni iba mapa inyaksü mulunga lir,” ta Jayasuriya-i AFP dang ashi. Jayasuriya ya taoba mapang Sri Lanka indang Test aser ODI captain liasü aser pa national selector tem rongnunga densema liasü.

Arishi küm 55 tain Jayasuriya-i, Iba ita India den white ball asayamung aser England den August ita masaya tsüngda Sri Lanka Cricket-i national team coach mapa abentsü atema pa dang asüngdanga liasü, ta ashi.

Jayasuriya ya taoba mapang

national selector ka liasü aser Sri Lanka tenung nungi Test, ODI, aser T20 nung asayar 586 nung asayaogo. Asaya aliba mapang pai century 42 yanglu aser wicket 440 agia liasü, anungji pa ya iba mapa atema tajangshiba aika bener aliba nisung ka lir.

Pa tatemsa international jenjang nung 2011 küm asayaogo.

Silverwood, shiba 2022 küm April ita nungi coach liasü, pai T20 World Cup nung team-i junga masayatetba sülen mapa toktsü. Iba asayamung nung SL team-i Netherlands dang akok aser South Africa o Bangladesh na sülen tasembuba jenjang nung tembanga liasü.

Pa lenisüba nung 2022 küm Sri Lanka-i T20 Asia Cup koka kanga junga tenzükba den 2023 küm 50-over Asia Cup final tonga asayaka, tawa tembangba T20 World Cup nungbo parnoki knockout stages metongteti liasü.

Kasa mapang nung taoba mapang Sri Lanka captain Mahela Jayawardena-ia taoba ita “consultant coach” mapa toktsüogo, anungji national team coaching staff nung temelenshi tulu adoktsü.

BILEMDANGANG

“Pela alitsü asoshi sentsüh nungi pila alitsü kanga tongtibang.”